

Kalaallit Nunaanni eqqartuussissuserisut inatsisilerinermik ikiuuttarnerat pillugu nalunaarut

Kalaallit Nunaanni eqqartuussisarneq pillugu inatsimmi § 84, imm. 3 aamma 4 naapertorlugu, tak. inatsit nr. 305 apriliip 30-anni 2008-neersoq, makku aalajangersarneqarput:

Eqqartuussissuserisut inatsisilerinermik ikiorsisartut

§ 1. Kalaallit Nunaanni eqqartuussisarneq pillugu inatsimmi § 84, imm. 1 malillugu, eqqartuussissuserisut Kalaallit Nunaanni allaffeqarfillit nammineq aningaasartuutiginaq eqqartuussisulersuussisarnermi sulianik suliarinnissinnaatitaasut inunnut aningaasaqarnikkut piumasaqaatinik § 254, imm. 3 malillugu naammassinnittunik inatsisilerinermik ikiorsisussaapput. Inatsimmi tassanerpiaq § 84, imm. 2 malillugu eqqartuussissuserisut Kalaallit Nunaanni allaffillit, imm. 1-imi aalajangersakkami ilanngunneqanngitsut, inatsisinik atortitsinermut ministerip aalajangigaanik oqartussaasunut nalunaaruteqarnikkut, taamaaqataanik pisussaaffeqalersinnaapput.

Imm. 2. Eqqartuussissuserisut Kalaallit Nunaanni inatsisilerinermik ikiorsisartut pillugit Kalaallit Nunaanni Eqqartuussivik nalunaarsuiffiliussaaq iluarsuiffiiguartagassaminik. Nalunaarsuiffik qimerloorneqarsinnaavoq Kalaallit Nunaanni eqqartuussivimmi, najukkani eqqartuussivinni, Kalaallit Nunaanni Kommunit Kattuffianni (Kanukokami), Kalaallit Nunaanni Naalagaaffiup Sinniisoqarfiani najukkanilu atuagaateqarfinni. Nalunaarsuiffik Kalaallit Nunaanni Eqqartuussivimmut najukkanilu eqqartuussivinnut saaffiginninnikkut tunniunneqarsinnaavoq.

Inatsisilerinermik ikiorserneqarnermut aningaasaqarnikkut piumasaqaatit

§ 2. Eqqartuussissuserisut inatsisilerinermik ikiuunnissaannik aalajangiinerni isertitanit akileraartarneq pillugu Inatsisartut inatsisaanni § 75 malillugu isertitat A-t aamma isertitanit akileraarutit 10.000 kr.-nik ilanngaasikkat pillugit Inatsisartut inatsisaanni § 74 malillugu isertitat B-t katinnerat isertitatut tunngavigineqassaaq, tak. isertitanit akileraarutit pillugit Inatsisartut inatsisaanni § 21, imm. 1 malillugu assigiimmik ilanngaatit, Kalaallit Nunaanni ingerlatseqatigiiffiit iluanaarutaannit akileraarusikkanit iluanaarutaasinnaasunik tapiliussartallit, tak. isertitanit akileraarutit pillugit Inatsisartut inatsisaanni § 86.

Imm. 2. Imm. 1 malillugu naatsorsuinerni atorineqassapput ukiup siuliani isertitanut naatsorsuutit inaarneranni isertitat ersertut ukiumilu pineqartumi Kalaallit Nunaanni ingerlatseqatigiiffiit iluanaarutigisinnaasaannut uppernarsaatit atorineqassapput.

Imm. 3. Imm. 1 malillugu naatsorsuinermi 304.000 kr.-nik ikinnerusunilluunniit isertitallit inatsisitigut ikiorserneqassapput. Inatsisilerinermik ikiorserneqartoq inooqateqarpat aappariillu isertitaat katillutik 386.000 kr.-uppata ikinneruppataluunniit inatsisilerinermik ikiorsisoqassaaq. Aappariit suliami soqutigisaat akерleriippata, inatsisilerinermik ikiorserneqartup isertitai kisimiittullu isertitaannut killigititaq atorineqassaaq. Katissimaneq angajoqqaatulluunniit oqartussaassuseq pillugu suliani, tak. Kalaallit Nunaanni eqqartuussiveqarneq pillugu inatsimmi kapitali 27, qinnuteqaateqartup isertitai aamma kisimiittut isertitaannut killigititaq atorineqarsinnaapput.

Imm. 4. Aningaasat imm. 3-mi taaneqartut meeqqamut ataatsimut, ilanngullugit meerassanut aamma qitornarsiamut ataatsimut 18-it inorlugit ukiulimmut inatsisilerinermik ikioqquneqartumi najugalimmut imaluunniit taassumanga pilersugaanerusumut ataatsimut 53.000 kr.-nik qaffanneqassapput.

§ 3. Isertitat § 2, imm. 1 malillugu naatsorsorneranni inatsisilerinermik ikioqqusup paasisstussiisutigisaannit allaanerungaatsiarpata, ullumikkut isertitat annertussusiat tunngavigineqassaaq.

§ 4. Inatsisilerineq pillugu eqqartuussissuserisumut ikioqqusup 2013-mi isertitat pillugit akileraartarnermut oqartussat inaarutaasumik naatsorsugaat saaffigisaminut takutissavai. Inatsisilerinermik ikioqqusup inooqateqarpat inooqataasup isertitai inaarlugit naatsorsukkat aamma takutinneqassapput. Aappariilli suliami soqutigisaat akerleriippata taanna atuutissanngilaq.

Imm. 2. Inatsisilerinermik ikioqqusup taassumaluunniit inooqataata isertitaat inaarutaasumik naatsorsorneqarsimannippata imaluunniit ikioqqusup § 3-mi pineqartoq patsisiginiarpagu, ullumikkut isertitaasa uppernarsaataat takutinneqassaaq.

Imm. 3. Immikkut ittumik nukinginnartoqartillugu imm. 1 imaluunniit 2 malillugu uppernarsaammik takutitisoqanngikkaluarpalluunniit, aningaasaqarnikkut piumasaqaatit naammassineqartutut isumaqarfigineqarpat § 5, imm. 1 malillugu inatsisilerinermik ikiorsiisoqassaaq.

Inatsisilerinermik ikiorsiinermit suliaqarfiit annertussusiallu

§ 5. Inatsisilerinermik ikiorsiineq oqaatsit atorlugit siunnersuinikkut pisassaaq allakkatigullu saaffiginnissutit nalinginnaasut allakkiunneqassallutik, matumani ilanngullugit nammineq aningaasartuutiginagu eqqartuussisulersuussinissamik qinnuteqaatit, eqqartuussinermi suliaassatut allakkiat, pigisat avinnissaat pillugu isumaqatigiissusiornerit, testamentit pisariitsut aappariilernermit ilu isumaqatigiissutit.

Imm. 2. Pissutsit immikkut ittut atuutsillugit Kalaallit Nunaanni Eqqartuussiviup akuersereerneratigut eqqartuussissuserisup inatsisilerinermik annertunerusumik ikiorsiisinnaavoq, aamma suliaq unerluussinertaqanngitsumik isumaqatigiissuteqarnikkut naammassineqarsinnaasoq ilimagineqarpat.

Imm. 3. Makkununga inatsisilerinermik ikiorsiisoqarsinnaanngilaq:

- 1) Pinerluttulerinermi pineqaatissiinermit iluunniit suliani pisortat pasisaannut innerluussaannulluunniit
- 2) sulianut namminersortut suliaannut tunngasunut annertunerunerusumillu inuussutissarsiornermut tunngassuteqartunut
- 3) akiitsunik isumakkeerinninneq pillugu sulianut
- 4) sulianut pisortat ingerlatsiviinut tunngasunut taakkunaniluunniit suliarineqartunut pisariaqartitsineq malillugu pisortat taakkunuuna ilitsersuinissaat ikiunnissaalluunniit ilimagineqarpat.

Imm. 4. Taamaattorli imm. 3, nr. 4-mi pineqartoq apeqqutaatinnagu pisortat ingerlatsiviata aalajangiineranut naammagittaalliut pillugu inatsisilerinermik ikiorsiisoqarsinnaavoq.

Imm. 5. Inatsisilerinermik ikioqqusup suliami tassani imm. 1 malillugu ikiorserneqarsinnaavoq aamma imm. 2 malillugu piumasaqaatit ajornartinngippassuk annertusisamik inatsisilerinermik ikiorserneqarsinnaalluni.

Imm. 6. Aningaasat § 6-imi taaneqartut iluanni suliaq naammassineqarsinnaanngitsutut siumut ilisimaneqarpat inatsisilerinermik ikiorsiinermit tapiisoqarsinnaanngilaq. Taamaattorli inatsisilerinermik ikiorsiineq tapiissuteqarfigineqarsinnaavoq aningaasat taaneqartut iluanni suliaq naammaginartumik tamanna naammassineqarsinnaasoq eqqartuussissuserisup siunnersuinermini missingersorpagu.

§ 6. § 5, imm. 1 malillugu 1.030 kr. tikillugit aningaasarsinikkut eqqartuussissuserisoq nalinginnaasumik inatsisilerinermik ikiorsiisinnaavoq.

Imm. 2. Kalaallit Nunaanni Eqqartuussiviup akuersereerneratigut § 5, imm. 2 malillugu 2.350 kr. tikillugit aningaasarsinikkut eqqartuussissuserisoq inatsisilerinermik ikiorsiisinnaavoq.

Imm. 3. Siunnersuinerup annertussusia suussusialu aalajangiisuutillugit imm. 1 aamma 2 malillugit aningaasarsiat marloriaataat tikillugit pisut tunngavigalugit aningaasarsiassanik Kalaallit Nunaanni Eqqartuussivik annertussusiliisinnaavoq.

Aalajangersakkat assigiinningsut

§ 7. Eqqartuussissuserisoq inatsisilerinermik ikiorsiiumanngissinnaavoq ikioqqusup piumasagaatai tunngavissaqarsorinanngippata imaluunniit suliap ingerlanneqarnera eqqartuussissuserisut ileqquannut pitsaasumut akerliuppat.

§ 8. Immikkorluinnaq ittunik pisoqanngippat suliami tassani illuatungiusoq ataasiinnaanngippat nalunaarut manna malillugu inatsisilerinermik ikiorsiinermit eqqartuussissuserisoq aningaasarsitinneqarsinnaanngilaq.

§ 9. § 6 malillugu Kalaallit Nunaanni Eqqartuussivik eqqartuussissuserisumut aningaasarsititsissaaq.

Imm. 2. Kalaallit Nunaanni Eqqartuussiviup suliamik suliarinninneranut atugassatut immersuiffissaq oqaasertalersugaq eqqartuussissuserisup immersussavaa. Immersugassaq oqaasertalersugaq Civilstyrelsimit suliarineqassaaq.

Imm. 3. Immikkut pissutissaqartillugu pingaartumillu § 5, imm. 2 malillugu annertusisamik inatsisilerinermik ikiorsiisoqartillugu aningaasarsiassat tunniutinnginneranni eqqartuussissuserisoq suliaq pillugu erseqqinnerusumik nassuiaateqassasoq Kalaallit Nunaanni Eqqartuussiviup piumasarisinnaavaa.

§ 10. Nalunaarut una atuutilersinneqarpoq 1. januar 2015-imi ullullu taassuma kingorna nalunaarummi aalajangersakkat inatsisilerinermik ikiorsiinernut atuutissallutik.

Imm. 2. Kalaallit Nunaanni eqqartuussissuserisut inatsisilerinermik ikiorsiisarnerat pillugu nalunaarut nr. 1243, 22. oktober 2013-imeersoq atorunnaarsinneqarpoq.

Justitsministeriet, ulloq 2. december 2014

METTE FREDERIKSEN

/ Astrid Mavrogenis